

合肥縣志卷第二十三

賜進士出身廬州府合肥縣知縣左輔纂修
人物傳第三

明

徐忠合肥人父用從太祖爲河南衛副千戶用老忠
嗣官累從大軍北征多所俘獲進濟陽衛指揮僉事
洪武末鎮開平燕王破居庸克懷來忠遂以開平降
從徇灤河與陳旭拔其城李景隆攻北平燕師自大
寧還救至會州置五軍張玉將中軍朱能將左軍李
彬將右軍房寬將後軍忠號驍勇使將前軍遂敗陳

暉於白河西破景隆於鄭邨壩白溝河之戰忠單騎
 突戰一指中流矢未暇去鏃急抽刀斷之控滿疾驅
 殊死戰燕王乘高見之謂左右曰眞壯士也進攻濟
 南克滄州大戰東昌夾河攻彰德破西水寨克東阿
 東平汶上大戰靈璧遂從渡江入京師自指揮同知
 累遷都督僉事封永康侯祿一千一百石予世券忠
 每戰摧鋒跳盪爲諸將先而馭軍甚嚴所過無擾善
 撫降附得其死力事繼母以孝聞夜歸必捐家廟而
 後入儉約恭謹未嘗有過成祖北巡以忠老成畱輔
 太子監國永樂十一年八月卒贈蔡國公諡忠烈子

安嗣卒子昌先卒昌子錡嗣弘治中佩征蠻將軍印
鎮湖廣平靖州武岡蠻卒子溥嗣卒庶兄源嗣卒子
喬松嗣卒子文燁嗣卒子應坤嗣卒子錫肩嗣卒無
子後封其從父應垣爲侯卒子錫登嗣崇禎十七年
流賊陷京師被殺錫肩妻朱氏成國公純臣女也夫
歿樓居十餘年不履地及城陷捧廟主自焚死

明史

鄭亨合肥人父用洪武時積功爲大興左衛副千戶
請老亨嗣職洪武二十五年應募持檄諭韃靼至斡
難河還遷密雲衛指揮僉事燕師起以所部降戰真
定先登進指揮使襲大寧至劉家口諸將將攻關成

祖慮守關卒走報大寧得爲備乃令亨將勁騎數百
卷旆登山潛出關後斷其歸路急攻之悉縛守關者
遂奄至大寧進北平都指揮僉事夜率眾破鄭邨壩
兵西破紫荆關掠廣昌取蔚州直抵大同還戰白溝
河遂北至濟南進都指揮同知攻滄州軍北門扼餉
道東昌戰敗收散卒軍深州明年戰夾河藁城畧地
至彰德耀兵河上還屯完縣明年從破東平汶上軍
小河戰敗王眞死諸將皆欲北還惟亨與朱能不可
入京師厯遷中府左都督封武安侯祿千五百石予
世券畱守北京時父用猶在受封爵視亨永樂元年

充總兵官率武城侯王聰安平侯李遠備宣府亨至
邊度宣府萬全懷來形便每數堡相距中擇一堡可
容數堡士馬者爲高城深池浚井蓄水謹瞭望寇至
夜舉火晝鳴礮并力監守規畫周詳後莫能易三年
三月召還旋遣之鎮七年秋備邊關平明年帝北征
命亨督運出塞將右哨追敗本雅失里大軍與阿魯
台遇亨率眾先大破之論功爲諸將冠其冬仍出鎮
宣府復從北征領中軍戰忽失溫追敵中流矢却復
與大軍合破之二十年復從出塞將左哨帥卒萬人
治龍門道過軍破兀良哈於屈裂河將輜重還擊破

寇之追躡者仍守開平成祖凡五出塞亨皆在行仁
宗卽位鎮大同洪熙元年二月頒制諭及將軍印於
各邊總兵官亨佩征西將軍印在鎮墾田積穀邊備
完固自是大同希寇患宣德元年召掌北京行後府
事已仍鎮大同轉餉宣府召降迤北部長四十九人
請於朝後撫之歸附者相屬九年二月卒於鎮亨嚴
肅重厚善撫士恥掎克在大同時鎮守中官撓軍政
亨裁之以理其人不悅然其卒也深悼惜之贈漳國
公諡忠毅妾張自經以殉贈淑人子能嗣督操五軍
營坐事謫塞上召復爵卒子宏嗣成化初佩征虜將

軍印鎮遼東孛來諸部入掠敗之長嶺山又敗之遼河尋掌南後府提督操江卒于英嗣弘治末充總兵官鎮陝西頗有禦寇功爲楊一清劾罷

明史

陳懷合肥人襲父職爲真定副千戶永樂初積功至都指揮僉事從平安南進都指揮使蒞山西都司事再從張輔擒安南賊簡定從都督費璵征涼州叛人虎保皆有功仁宗立進都督同知宣德元年代梁銘爲總兵官時官軍征交趾者屢敗召發松潘軍援之將士憚行千戶錢宏與眾謀詐言番叛率兵掠麥匝諸族番人震恐遂反殺指揮陳傑等陷松潘疊溪圍

威茂諸州指揮吳玉韓整高隆相繼敗績西鄙騷然
詔遣鴻臚丞何敏指揮吳瑋往招之而命懷統劉昭
趙安蔣貴帥師數萬隨其後瑋等至賊不順命瑋與
龍州知州薛繼賢擊賊復松潘比懷至仍用瑋前鋒
遂復巖溪降二十餘寨招撫復業者萬二千二百餘
戶歸所掠軍民二千二百餘人事遂定進左都督厚
賚金幣而絀瑋功不錄懷畱鎮四川在鎮驕縱不法
干預民事受賕庇罪人侵奪屯田笞辱僉事柴震等
數爲言官所劾帝降敕責讓復以御史王禮彈章示
之懷引罪置不問六年松潘勒都北定諸族暨空郎

龍溪諸寨番復叛懷遣兵戰敗指揮安寧等死者三百餘人懷乃親督兵深入破革兒骨寨進攻空郎乞兒洞賊敗斬首墜崖死者無算革兒骨賊復聚生苗邀戰擊破之剿戮殆盡於是任昌牛心諸寨番聞風乞降羣寇悉平久之巡按御史及按察使復奏懷僭侈踰分每旦令三司官分班侍立有事跪白懷中坐稱旨行遣且日荒於酒不飭邊備致城寨失陷宣宗怒召懷還命文武大臣鞠之罪當斬下都察院獄宥死落職正統二年以原官鎮大同時北人來貢者日給廩餼爲軍民累懷言於朝得減省居二年以年老

召還命理中府事九年春與中官但住出古北口征兀良哈還與馬亮等同封而懷得平鄉伯十四年扈駕北征死於土木贈侯諡忠毅子輔乞襲爵吏部言非世券執不許景帝以懷死事許之輔卒子政請襲吏部執如初中旨許嗣政鎮兩廣久自陳軍功乞世券吏部復執不可詔予之政卒子信嗣弘治中信卒無子弟俊嗣

明史

郭亮合肥人爲永平衛千戶燕兵至永平與指揮趙彝以城降卽命爲守時燕師初起先略定旁郡邑旣克居庸懷來山後諸州皆下而永平地接山海關障

隔遼東既降北平益無患成祖遂南敗耿炳文於真定既而遼東鎮將江陰侯吳高都督楊文等圍永平亮拒守甚固援師至內外合擊高退走未幾高中讒罷楊文代將復率眾來攻亮及劉江合擊大敗之累進都督僉事成祖卽位以守城功封成安侯祿千二百石世伯爵永樂七年守開平以不檢聞二十一年三月卒贈興國公諡忠壯妾韓氏自經以殉贈淑人子晟當嗣伯仁宗特命嗣侯宣德五年坐扈駕先歸革爵尋復之無子弟昂嗣伯

明史

陳瑄字彥純合肥人父間以義兵千戶歸太祖累官

都指揮同知瑄代父職父坐事戍遼陽瑄伏闕請代
詔併原其父子瑄少從大將軍幕以射雁見稱屢從
征南番又征越嶲討建昌叛番月魯帖木兒踰梁山
平天星寨破寧番諸蠻復征鹽井進攻卜木瓦寨賊
熾甚瑄將中軍賊圍之數重瑄下馬射傷足裹創戰
自已至酉全師還又從征賈哈刺以奇兵涉打冲河
得間道作浮梁渡軍旣渡撤梁示士卒不返連戰破
賊又會雲南兵征北夷有功遷四川行都司都指揮
同知建文末遷右軍都督僉事燕兵逼命總舟師防
江上燕兵至浦口瑄以舟師迎降成祖遂渡江旣卽

位封平江伯食祿一千石賜誥券世襲指揮使永樂元年命瑄充總兵官總督海運輸粟四十九萬餘石餉北京及遼東遂建百萬倉於直沽城天津衛先是漕舟行海上島人畏漕卒多閉匿瑄招令互市平其直人交便之運舟還會倭寇沙門島瑄追擊至金州白山島焚其舟殆盡九年命與豐城侯李彬統浙閩兵捕海寇海湓隄圯自海門至鹽城凡百三十里命瑄以四十萬卒築治之爲捍潮隄萬八千餘丈明年瑄言嘉定瀕海地江流衝會海舟停泊於此無高山大陵可依請於清浦築土上山方百丈高三千餘丈立

堠表識旣成賜名寶山帝親爲文記之宋禮旣治會
通河成朝廷議罷海運仍以瑄董漕運議造淺船二
千餘艘初運二百萬石寢至五百萬石國用以饒時
江南漕舟抵淮安率陸運過壩踰淮達清河勞費甚
鉅十三年瑄用故老言自淮安城西管家湖鑿渠二
十里爲清江浦導湖水入淮築四閘以時宣洩又緣
湖十里築隄引舟由是漕舟直達於河省費不訾其
後復濬徐州至濟寧河又以呂梁洪險惡於西別鑿
一渠置二閘蓄水通漕又築沛縣刁陽湖濟寧南旺
湖長隄開泰州白塔河通大江又築高郵湖隄於隄

內鑿渠四十里避風濤之險又自淮至臨清相水勢
置閘四十有七作常盈倉四十區於淮上及徐州臨
清通州皆置倉便轉輸慮漕舟膠淺自淮至通州置
舍五百六十八舍置卒導舟避淺復緣河隄鑿井樹
木以便行人凡所規畫精密宏遠身理漕河者三十
年舉無遺策仁宗卽位之九月瑄上疏陳七事一曰
南京國家之根本乞嚴守備二曰推舉宐覈實無循
資格選朝臣公正者分巡天下三曰天下歲運糧餉
湖廣江西浙江及蘇松諸府竝去北京遠往復踰年
上逋公租下妨農事乞令轉至淮徐等處別令官軍

接運至京又快船馬船所載不過五六十石每船官軍足用有司添差軍民遞送拘集聽候至有凍餒請革罷四曰敎職多非其人乞考不職者黜之選俊秀補生員而軍中子弟亦令入學五曰軍伍竄亡乞覈其老疾者以子弟代逃亡者追補戶絕者驗除六曰開平等處邊防要地兵食虛乏乞選練銳士屯守兼務七曰漕運官軍每歲北上歸及修船勤苦終年該衛所又於其隙雜役以重困之乞加禁絕帝覽奏曰瑄言皆當令所司速行遂降敕獎諭尋賜券世襲平江伯宣宗卽位命守淮安督漕運如故宣德四年言

濟寧以北自長溝至棗林淤塞計用十二萬人疏濬
半月可成帝念瑄久勞命尙書黃福往同經理六年
瑄言歲運糧用軍十二萬人頻年勞苦乞於蘇松諸
郡及江西浙江湖廣別僉民丁又於軍多衛所僉軍
通爲二十四萬人分番迭運又江南之民運糧至臨
清淮安徐州往返一年失悞農業而湖廣江西浙江
及蘇松安慶軍士每歲以空舟赴淮安載糧若令江
南民撥糧與附近衛所官軍運載至京量給秬米及
道里費則軍民交便帝命黃福及侍郎王佐議行之
更民運爲兌運自此始也八年十月卒於官年六十

有九追封平江侯贈太保諡恭襄初瑄以濬河有德
於民民立祠清河縣正統中命有司春秋致祭子佐
嗣卒孫豫字立卿讀書修謹正統末福建沙縣賊起
以副總兵從寧陽侯陳懋分道討平之進封侯也先
入犯出鎮臨清建城堡練兵撫民安靜不擾明年召
還父老詣闕請畱從之景泰五年山東饑奉詔振卹
尋守備南京天順元年召還益歲祿百石三年卒贈
黔國公諡莊敏子銳嗣伯成化初分典三千營及團
營尋佩平蠻將軍印總制兩廣移鎮淮揚總督漕運
建淮河口石閘及濟寧分水南北二閘築堤疏泉修

舉廢墜總漕十四年章數十上日本貢使買民男女
數人以歸道淮安銳畱不遣贖還其家淮揚饑疫煮
糜施藥多所存濟弘治六年河決張秋奉敕塞治還
增祿二百石累加太傅兼太子太傅十三年火篩寇
大同銳以總兵官佩將軍印往援旣至擁兵自守爲
給事中御史所劾奪祿閒住其年卒子熊嗣正德三
年出督漕運劉瑾索金錢熊不應銜之坐事逮下詔
獄謫戍海南衛奪詔券熊故贖貨在淮南頗殃民雖
爲瑾構陷人無惜之者瑾誅赦還復爵卒無子再從
子圭嗣以薦出鎮兩廣封川寇起圭督諸將往討擒

其魁俘斬數千加太子太保復平柳慶及賀連山賊
加太保蔭一子安南范子儀等寇欽廉黎岐賊寇瓊
崖相犄角圭移文安南曉以利害使縛子儀而急出
兵攻黎岐敗走之論功復蔭一子加歲祿四十石圭
能與士卒同甘苦聞賊所在輒擐甲先登深箐絕壑
衝冒瘴毒無所避以故所向克捷在粵且十年殲諸
小賊不可勝數召還掌後軍府圭妻仇氏咸寧侯鸞
女弟也圭深嫉鸞鸞數短圭於世宗幾得罪鸞敗帝
益重圭命總京營兵寇入紫荆關圭請出戰營於盧
溝寇退而止明年寇復入古北口或議列營九門爲

備主以徒示弱無益寇亦尋退董築京師外城加太子太傅卒贈太傅諡武襄子王謨嗣僉書後軍出鎮兩廣賊張璉反屠掠數郡王謨會提督張臬討平之擒斬三萬餘論功加太子太保蔭一子萬厯中出鎮淮安總漕運入掌前軍府事卒贈少保諡武靖

明史

宋晟字景陽定遠人父朝用兄國興並從渡江皆積功至元帥攻集慶國興戰歿晟嗣其職旣而朝用請老晟方從鄧愈克徽州召還襲父官累進都指揮同知厯鎮江西大同陝西洪武十二年坐法降涼州衛指揮使十七年五月討西番叛酋至亦集乃路禽元

海道千戶也先帖木兒國公吳把都剌赤等俘獲萬
八千人送酋長京師簡其精銳千人補卒伍餘悉放
遣召還復爲都指揮進右軍都督僉事仍鎮涼州二
十四年充總兵官與都督劉眞討哈梅里其地去肅
州千餘里晟令軍中多具糧糗倍道疾馳乘夜至城
下質明金鼓震地闔城股栗遂克之禽其王子列兒
怯帖木兒及僞國公以下三十餘人收其部落輜重
以歸自是番戎懾服兵威極於西域明年五月從藍
玉征罕東徇阿眞川土酋哈咎等遁去師還調中軍
都督僉事二十八年六月從總兵官尙興出開原至

忽刺江部長西陽哈遁追至甫答迷成俘人畜而還
明年拜征南右副將軍討廣西幟幪諸寨苗擒斬七
千餘人又明年總羽林八衛兵討平五開龍里苗三
十一年出鎮開平從燕王出塞還城萬全諸衛建文
改元仍鎮甘肅成祖卽位入朝進後軍左都督拜平
羌將軍遣還鎮永樂三年招降把都帖木兒倫都兒
灰等部落五千人獲馬駝牛羊萬六千封西寧侯祿
千一百石世指揮使晟凡四鎮涼州前後二十餘年
威信著絕域帝以晟舊臣有大將材專任以邊事所
奏請輒報可御史劾晟自專帝曰任人不專則不能

成功況大將統制一邊寧能盡拘文法卽敕晟以便
左從事晟嘗請入朝報曰西北邊務一以委卿非召
命毋輒來尋命營河西牧地及圖出塞方略會病卒
五年七月也晟三子長瑄建文中爲府軍右衛指揮
使戰靈璧先登斬數級力鬪死瑄弟琥尙成祖女安
成公主得嗣侯子世券八年佩前將軍印鎮甘肅十
年與李彬捕叛酋老的罕俘斬甚眾召還洪熙元年
坐不敬奪爵并削駙馬都尉官宣德中復都尉琥旣
廢弟瑛嗣瑛尙咸寧公主正統中厯掌左軍前府事
氏刺也先入寇瑛充總兵官督大同守將朱冕石亨

等戰陽和全軍敗沒瑛及冕皆戰死贈鄆國公諡忠
順子傑嗣景泰中典禁兵宿衛以謹慎稱卒子誠嗣
署右府事復佩平羌將軍印鎮甘肅誠有材武嘗出
獵至涼州遇寇掠牛馬北去誠三矢殪三人寇驚散
盡驅所掠還九傳至孫裕德死流寇難明史○舊志云其先定遠
人世居合肱府志同今仍之

龍源字有本宋南渡時其先自許州遷地姥山因家
焉源性剛直警敏力學永樂初徵修大典授工科給
事中以親喪居家覩民牧不良於政者卽聞於朝其
人賂當道誣之坐免官好爲詩所著有友雲集

江南

方正永樂初以楷書徵修大典入太學授工部都水主事改營繕主事時建北都督工規畫有條端午應制賦詩賜寶鏹乳酒由屯田郎擢江西右參政平長河峒賊朱南等陞福建左布政境內旱禱雨沾足士民作詩頌之擒處州礦賊永福興化秋稅武彝山茶悉心調停民稱善治子杲字景輝正統乙丑進士授兵部主事以廉平聞己巳邊警奉敕取戰馬於南京還陞員外郎上時務十二事言多剴切少係于公謙歎曰通敏練達真有用才也

史昭合肥人永樂初積功至都指揮僉事八年充總兵官鎮涼州土兵老的罕先與千戶虎係作亂虎係敗老的罕就撫昭上書言其必叛狀未至而老的罕果叛昭與都指揮滿都等擊平之移鎮西寧仁宗立進都督僉事上言西寧風俗鄙悍請設學校如中土報可宣德初昭以衛軍守禦不暇屯種其家屬願力田者七百七十餘人請俾耕藝收其賦以足軍食從之五年曲先衛都指揮使散卽思邀劫西域使臣昭率參將趙安偕中官王安王瑾討之長驅至曲先散卽思望風遁擒其黨答答不花等獲男女三百四十

人馬駝牛羊三十餘萬威震塞外捷聞璽書慰勞賞
賚加等七年春以征西將軍鎮寧夏孛的達里麻犯
邊遣兵擊之至闊台察罕俘獲甚眾進都督同知正
統初詔以寧夏孤懸河外東抵綏德二千里曠遠難
守請於花馬池築哨馬營增設烽堠直接哈刺兀速
之境邊備大固尋進右都督時阿台朶兒只百數寇
邊詔昭與甘肅守將蔣貴趙安進剿竝無功被詔切
責貶都督僉事三年復右都督八年以老召還明年
卒昭居寧夏十二年老成持重兵政修舉亦會敵勢
衰弱邊境得無事兵部尙書王驥寧夏參將王榮嘗

舉其過朝議以昭守邊久習兵事不易也

明史

張敬字伯起永樂中貢入太學除廣東道監察御史
扈從北征軍令嚴肅有金牌鑑幣之賜監閩延平府
銀屏山務擢陝西按察司僉事政尙平恕務存大體
因被誣左遷知廣平縣後復官僉事致仕孫淳字宗
厚成化丁未進士知瀏陽縣糧長侵賦鉅萬淳至以
至誠勸諭竝感泣輸完擢監察御史時有坐言事下
獄者淳抗疏救之得釋按貴州用計擒賊渠普安阿
係父子餘黨五十九寨悉就撫轉吉安知府多善政
民爲立祠陞四川按察司副使鎮松潘諸番懾服進

太僕少卿尹應天以副都御史撫鄖陽改保定防邊賑饑聲望大著數引疾乞休得旨馳驛回籍卒賜祭葬與祖敵俱祀鄉賢子相標以學行世其家

府志

王憲永樂辛丑進士任監察御史性峭直彈劾無所忌擢山東按察司副使鎮遼東等處奉敕贊機務邊境肅然尋進貴州按察使署左僉都御史

府志

吳鑑宣德丁未進士擢監察御史剛介不阿嘗乘花馬京師爲之語曰花馬吳升南陽府知府

府志

朱信字以誠事親篤孝正統辛酉舉人以經學知名授南安府學教授三聘爲鄉試考官士類咸推重之

府志

沈諲字用正景泰甲戌進士除刑部主事升郎中出知東昌府政尚嚴明折獄明允銓注天下廉能官第一沒後妻子竟致凍餒

江南通志

高興張俊沈諲鄭元事親至孝興父歿諲母歿皆廬於墓皆有烏巢墳樹興諲號哭輒悲鳴以助其哀興服闋歸有白鳥數百隨後翔集其宅良久方去俊亦以廬墓間與興同天順二年旌諲成化間旌元五世同居弘治時旌

四人名見明史孝義傳

吳凱字廷輔成化壬辰進士母死旣葬每旦必至墓

所號哭進饌服闋拜兵科左給事中封駁敷奏動存
大體承旨核邊儲抑豪右正典守之罪清京衛軍劾
武弁不職者四百餘員軍政肅然憲廟嘉獎賞賚甚
厚後轉廣東少參

江南通志

朱世藩七歲喪父奉母李氏盡孝母故藩嚙棺呼號
口眼血出遂喪明奉旨旌

江南通志

衛郡早喪父事母至孝母病篤思飲泉水是年赤地
千里郡叩天掘泉未及仞泉水湧出持歸奉母母遂
愈鄉人稱爲衛孝泉

江南通志

朱震成化間人以孝稱時有火災延燒數百家至震

所居火忽飛越過仍復蔓延震屋獨完知府朱鏞獎
異之有孝行格天天鑒德當年飛火過鄰家之句府志

郭鏐襲彭城衛指揮使成化初以從征荔浦功進都
指揮僉事中武舉遷同知爲張懋所舉代寧津都勝
備倭揚州弘治中鎮守廣西副總兵破府江獍賊遂
以時望擢總漕運鏐沈毅有將略累進都督同知凡
軍民利病多陳於朝嘗濬通州河二十里置壩令淺
船搬運歲省白金數萬當孝宗時朝政整肅文武大
臣率得人鏐筦漕十三年不易正德初始召佐後府

尋卒 明史王信傳

何敬字允恭謙謹和易刻厲好學成化間歲貢生任

延平府知事卒於官 府志

鄒琥弘治壬子舉人任撫州推官升本府通判時宸

濠反部卒橫行剽掠撫守懼稱病不視事琥攝篆濠

遣人收篆琥日朝廷篆誰敢取又誰敢與逆卒語塞

竟已 是時王公守仁以琥督運糧餉贊兵事勞悴遴

疾卒王深痛恤命有司護其喪歸

府志○明史王守仁傳云通判撫州

鄒琥等皆引兵來會舊作周琥誤

楊欽字敬之王戌進士授戶部主事監度支清倉場

疏論鼓鑄通商貨戍玩法攬頭數十人升兵部車駕
郎中不阿權貴覈郵符整邊備爲大司馬劉大夏所
重升光祿寺少卿守正杜私十年不調嘉靖乙酉冢
宰廖立薦爲南太僕少卿

府志

周璽字天章廬州衛人弘治九年進士授吏科給事
中三遷禮部都給事中慷慨好言事武宗初卽位請
毀新立寺觀屏逐法王真人停止醮事竝論前中官
齊元煉丹糜金罪頃之以久雨偕同官劾侍郎李溫
太監苗逵九月以星變復劾溫及尙書崔志端熊翀
賈斌都御史金澤徐源等翀溫澤因是罷帝遣中官

韋興守鄭陽璽立言不可尋復偕同官言邇者聰明
日蔽膏澤未施講學一暴而十寒詔令朝更而夕改
冗員方革復畱鎮監撤還更遣解戶困於交收鹽政
壞於陳乞厚貲晚而駕帖頻頒私近習而帑藏不覈
不可不亟爲釐正不聽正德元年復應詔陳八事中
劾大寮賈斌等十一人中官李興等三人勦賊張懋
等七人邊將朱廷解端李禧等三人未幾言陛下卽
位以來鷹犬之好糜費日甚如是不已則酒色游觀
便佞邪僻凡可以悅耳目蕩心志者將無所不至光
祿上供視舊十增七八新政已爾何以克終御史何

天衢等亦以爲言章下禮部尙書張昇請從之帝雖不加譴不能用也明年擢順天府丞璽論諫深切率與中官牴牾劉瑾等積不能堪至是命璽與監丞張淮侍郎張縉都御史張鸞錦衣都指揮楊玉勘近縣皇莊玉瑾黨三人皆下之璽辭色無假且公移與玉止牒文王奏璽侮慢敕使瑾卽矯旨逮下詔獄拷掠死瑾誅詔復官賜祭恤其家嘉靖初錄一子

明史

孔彪字世奇正德戊午舉人知東阿清平陽穀三縣

歷著賢聲擢知沁州歸巡撫張惟恕按廬贈以詩云當年遊上國風雨過阿城山鳥當尊語春風滿縣明

天涯霜雁寂秋晚玉驄行白首驚相見回思傾蓋情
人多誦之

府志

高誨字廷弼正德辛酉舉人授青城知縣升萊州府
通判擢知養利州辭不赴好詩賦有泰山覽勝諸刻
府志

沈俊字仁傑正德辛未進士知萊陽縣賦役繁重俊
極力湔刷政教以興拜監察御史按山西湖廣所至
雪冤滌弊舉賢宥過擢山東參議卒於官子孫貧寒
至不能自存

府志

方介字子和嘉靖乙未進士歷義烏黃巖知縣處州

府知府所至以廉著性鯁介有古循吏風

府志

沈秉直字尊生年十二刲股療母疾後爲縣學生奉
旨旌

江南通志

鄭杲字義民父歿廬墓以哀毀卒教諭新塗於鳳題
其墓曰篤孝鄭生從兄梁事祖亦孝時人謂之二鄭
府志

董子策號霞峯嘉靖戊戌進士以戶部郎權稅潞墅
關商舶輻輳乃於關傍別開支河以便民船嘉靖末
晉廣東按察司僉事以疾辭歸家居四十餘年好施
予設義塚文章著述爲時所重

江南通志

秦寵字吳齋嘉靖乙卯舉人任荊州同知楚撫王世正獎其才能列首薦升本府知府轉廣西副使

府志

蔡悉字士備合肥人嘉靖己未進士授常德推官築郭外六隄以免水患擢南京戶部主事累官南京尙寶卿移署國子監嘗請立東宮又極論礦稅之害有學行恬宦情仕五十年家食強半清操亮節淮西人宗之

明史王畿傳

萬振孫字性孺嘉靖壬戌進士歷刑部主事員外郎知襄陽府服官剛正屬縣有虎而冠者振孫廉其狀白諸上擬戍監司爲解弗釋也亡何中蜚語歸數年

補汀州陞湖廣按察使副使通礦使縱橫振孫捕其
爪牙立斃之以忤旨削籍起廣東參政未就卒天啓
初特贈太僕寺少卿

江南通志

趙裳字憶蓮天性孝友五歲喪父卽知擗踊號哭事
兄恭敬言動不失寸尺蔡悉云不講道而眞實體會
者獨有趙子洵醇儒也子元善亦孝友邑人奉爲楷
模焉

舊志

童官字雙松節婦欒氏子也少孤事母至孝母卒廬
墓三年其居相去里許足跡不一至鄰火延其居亦
不返郡人黃道年爲作傳略云母節子孝竝萃一門

黃道年字延卿隆慶辛未進士授江西南城知縣調
天台擢漢州知州所在有異政性耿介不問生產所
得金隨手散去貧交待以舉火者甚眾著有中庸正
解二十一史駁浮槎山房詩稿子克嘉弟道月道日
道月字德卿萬厯丙戌進士官中書舍人風神俊朗
好爲詩年三十九卒有詩集今不存道日字荆卿以
諸生入國子監讀書亦有名於時克嘉丁丑中武進
士任江西湖東守備時山賊起克嘉討平之後福建
閩羅宋三家賊萬眾流入磁龜憲檄諸營合剿克嘉

先登斬首無數因馬蹶遇害

府志

王廷範隆慶中以例入北雍有遠省舉人蔣姓者下第流落廷範資之以歸後蔣官貴州巡撫廷範佐普安州召入稱謝甚見委重及卒蔣爲治喪假驛傳歸之

府志

李篋好義士也冬日嘗備襦袴及米待里之無衣食者萬厯十七年歲大祲捐資助賑存活無數撫孀弟媳胡氏姪收春甚有恩禮收春後與篋子先春俱爲府學生先春爲定遠學訓導曾孫世藻別有傳

舊志

李得春事親至孝年十二父病篤聞人言嘗糞甘苦

可卜生死卽效之及父母歿廬墓三年冬月有野草
生花之異學使蔡某具疏題請奉旨旌

江南通志

竇子偁字燕雲萬厯壬辰進士素以風節自持授大理
寺評事卽具疏請建儲董上谷餉輸羨六萬餘蒙
賜金襴異守泉州考滿提調湖廣學政厯官至福建
布政使歸修祠置祭租贊守令修學助置學田世稱
淮南先生祀鄉賢

江南通志

趙元吉字慎所萬厯乙未進士厯工部員外郎出知
建昌府以嚴峻忤俗致仕

府志

龔承先字元鑑先世豫章籍癸卯舉人知浙江分水

縣升祿勸州知州皆有惠政歿祀鄉賢孫鼎華貴贈
兵部尙書子萃肅丙辰進士授吉安推官擢御史論
邊督張我續貪冒之罪白知州汪心淵守徐之功糾
袁崇煥之壞疆事舉方震孺之有才品悉稱言職差
長蘆巡鹽內升太僕寺少卿子鼎英崇禎壬午舉人
官戶部主事俱以詩文名

府志

高效愷字虞咨萬厯壬子舉人爲汾州知州轉武定
州居官清慎民戴其德歸三舉鄉飲賓年八十卒

府志

許如蘭字湘畹萬厯丙辰進士知光州遷工部郎不

附闕宦出知紹興府舉卓異備兵密雲轉山西蒲州
道密人請畱未赴旋奉命撫蘇以病歸再出巡撫廣
西折悍藩平普莫二賊進副都御史著奏議十卷香
雪菴詩文十二卷天然硯譜一卷祀鄉賢

江南通志

朱辰萬厯間諸生與妻李氏奉母盡孝母病篤衣不
解帶者三月妻素羸與姑相繼卒後歲大旱守令造
廬詢所以致旱之故備陳廬民愚惑有喪多年不葬
者旱魃爲災厥有明驗守令申禁旬月歸葬四千餘
家雨澤尋沛縣爲詳府准給冠帶

江南通志

陸爾綏祖籍巢人後居合肥路拾遺金覓其人還之

遺者以半謝綏笑曰分君之半何如畱君之全堅辭不受有劉萬仲者出門拾遺金持歸訪問知爲山東王羽潤所失亟還之王泣謝曰吾非此將爲異域鬼矣願分其半以謝萬仲亦弗受而去又有靳萬元者讓產却金俱有篤行君子之風

府志

程楷字畸人天啟乙丑進士知平湖縣以治行擢南禮部郎出守東昌吏有以金餽者峻拒之歷雲南參政未久歸養崇禎壬午流賊圍城同經歷鄭元壽協守南薰門城陷不屈死越數日家人具殮面色如生妻高氏聞楷殉難亦投繯死漕撫史可法爲文祭之

狀聞追贈光祿卿廕一子入監讀書祀鄉賢

江南通志

志

高麟游字泰符萬厯丁酉貢生爲廣西靈川縣知縣

厯官慶陽東路同知督理兵餉紀敘賜金緞因病歸

助城守兩舉鄉飲賓年七十三卒

府志

王藋字侶葵以恩貢任臨清主事督關悉屏陋規以

廉介稱著有書經便覽

舊志

殷尙禮性惇慤爲里長者頗豐於財親故見告慨予

之子士淳縣學生

府志

阮自強母劉氏祖母鮑氏相繼病自強剗股以進知

縣熊文舉表其門

府志

胡志藩字屏王天啟乙丑進士授中書舍人先是郡中馬遷係無爲六安合肥舒城廬江五州縣協濟後獨累胞志藩疏言州縣苦樂不均始議僉點僱募五屬俱得其平入御史臺按宣大驕將悍卒靡不懾服卒於官弟志鴻縣學生壬午寇亂後移居鄉莊貧友多依以爲活親黨子女不能婚嫁者必成全之

府志

李蘧字二則初名當泰天啟丁卯舉人直指張公重其才疏薦之敘城守功授中書舍人加職方郎管章奏閣部史可法具題加銜光祿少卿順治初起補未

任府志

李懋修字成章崇禎戊辰歲貢性英爽方頤修髯聲如洪鐘遇事敢言凡邑中田賦徭役廩餼之屬有未協者輒析之教授崇川遷正陽署上蔡縣事歸著浮峯集一卷

府志

陳系字虞耳李澹然字公永系崇禎戊辰貢入太學有文名庚辰授太原知縣改教婺源俱未赴與澹然讀書於朝霞山系著有詩文二帙年七十六卒澹然性孤騫寡合所著有曠園集隱几集黃葉菴詩

府志

方自勉字聖修性方嚴不苟然諾里人比之王彥方

隱於湖濱以古學教授生徒子華善文詞

江南通志

王寢大字幼章崇禎丁丑進士事繼母撫異母弟五人無間言乙亥賊寇北門親冒矢石捍禦守者復集城賴以全皖撫史可法重其人機務悉諮以行以廉能卓異擢南吏部郎旋告歸壬午後三遇旱蝗捐貲助賑規畫甚善具有幹略其學尤長于史著春秋說史綱抄明末條議當變革者十餘事

江南通志

吳士講字心啟崇禎辛未進士授南兵部車駕司遷本部員外郎出知大名府復補開封闖賊攻破開封士講歸後論功升川南道中途病發具疏告歸年七

十卒 府志

樊孔學廬州衛百戶乙亥流賊襲北門孔學領眾擊賊見勢敗遙語城上守者曰賊鏊兜皆紙不足懼慎防禦可也賊怒鏢之有魯弘道者材力過人以城守功題授守備 府志

方四合肥丐者乙亥賊圍城四絕城下與賊相望食頃佯竄水中賊以爲死也注視之四儵從水底躍起扭一賊碎首游泳而度 舊志

張四喆乙亥流寇圍廬急率弟四美四奇與賊戰城下不勝謂兩弟曰城必陷與其舉家戮辱死不如舉

家清白死遂與弟及妻女等一十五人投井死

江南

通志

沈暉字肖廬知山東利津縣多善政後告歸知縣熊公禮請爲鄉飲賓崇禎十三年歲饑設厰賑粥次年復大疫民多委溝壑捐資數千施棺掩骼又復於三河鎮建沈家橋至今無病涉焉

舊志

李雲仍字冲白縣學生崇禎庚辰辛巳連旱捐米三百五十石以賑饑者先是乙亥賊設雲梯百具攻城人情惶懼雲仍捐銀三百五十兩募勇敢殺賊毀其梯賊退知府吳大朴題其室曰義風多士

府志

許國忠字抱赤府學生族黨中有貧乏者恤之崇禎
庚辰辛巳大旱輸粟五百石賑濟又捐貲以修城

府志

徐日升字杲卿縣學生少喪母事繼母以孝聞庚辰
辛巳大饑道殣相望日升出庾積數千石以賑一時
翕然慕義爭相效法肥民賴以全活者甚眾巡撫鄭
公旌之

府志

王明舜字鳳泉生有至性兒時從里社飲每懷果遺
母人稱其孝崇禎庚辰歲大祲悉出所積散之以好
施故家致中落不悔也

舊志

高克抑字美度事繼母以孝聞讀書蜀山之麓常踰年不歸性淡泊不妄交遊而意氣深重崇禎乙亥恩選主事拔置第四不仕

舊志

趙之璞字連臣廬州衛指揮同知壬午寇亂分守小東門賊攻之甚力之璞率軍士魯大漢等以石擊之死亡頗眾賊懼退五月七日賊復至城潰戰死弟之炎於賊圍中尋獲其尸歸葬之炎字崑白

府志

田起潛字震初廬州衛世襲指揮性耿直卞急流寇張獻忠命其弟八大王者率眾攻廬起潛與知府吳大朴約吳守東南起潛守西北北關人與賊戰盡被

賊殲乘勢登外城樓起潛急命發大砲砲不震時士
卒皆走散起潛嚙指巾斷漚血砲上砲發八大王震
死餘眾夜遯城得全

舊志

金玉度字冲若崇禎甲戌武進士任崇明守備候陞
回里值寇至協守時雍門率家童數十人巷戰被創
死

府志

趙嗣蕃字千之縣學生壬午城潰眾奔竄嗣蕃衣冠
坐中堂賊入強之跪不屈賊怒牽至西門縛於樹罵
不絕口割其舌以血喫之被殺

府志

蔡世和字强子縣學生尙寶卿悉孫壬午城陷被執

罵賊死墓在小東門外倪家圩

府志

王時彥字輔明廩生壬午城陷死妻張氏聞變投水

死母湛氏不食死

舊志

吳士任字顯伯府學廩生夙以忠義自命城陷與賊

力戰被創死

府志

邱宗開字爾丞府學生壬午寇亂宗開出家資招勇

敢保守鄉村得免賊害宗開早卒其妻熊氏余氏苦

守教子之倫成名

舊志

葛一本字肖華縣學生年十三母李氏病刲股療之
兄亡撫其子及孫與己子無異壬午寇至守南門關

以身殉焉

府志

趙廷璋縣學生性至孝壬午城陷繼母折足負以逃至石香鑪岡爲賊獲哀懇迫切賊感而釋之母子俱全族有孤女貧乏無依璋養爲己女嫁之脫友人張如皞于難歿後家甚貧妻陳氏苦節自守邑人莫不哀之

府志

童會生南鄉豐樂鎮人壬午寇變父子被虜賊欲殺其父會生跪泣願以身代賊憐而俱釋之家故貧極力以供甘旨父病嘗藥呼天求救淚盡繼以血撫幼弟亦克盡兄道焉

舊志

王典字大章慷慨好施居南鄉壬午城陷被難者幾百人典以所居分處飲食之全活甚眾

舊志

高翰冲字雲翔府學廩生讀書蜀山僧舍甲申聞變投繯死

府志

趙伸一邑諸生居家以孝友稱寇亂後曾贖難婦三人還之或謂其知學云

府志

王明正性孝友年十五刲股愈母病知縣旌曰童心篤孝伯兄六十無嗣力爲置妾後生子景綱入縣學正子景維爲邑明經孫楫霖俱諸生世以孝友聞

舊

沈國賓以孝聞有石坊建堰城壩紀載甚詳今不存
舊志

李先綦廬之諸生也崇禎時寇逼郡城時合肥知縣
爲西江熊文舉誓與城俱亡先綦進曰公無慮寇寇
不足下也文舉曰生卽能策戰守顧餉安在無以給
之且憂內亂先綦曰某家有粟千鍾可支旬日於是
畫計分門固守廬之險在東西門文舉自守西門以
東城委先綦先綦至申明約束時出酒食以餉守者
士益感激賊來窺瞰知西門不可撼則轉而之東盡
日夜攻擊先綦率死士衝之斬殺無算賊憤以火攻

烈焰漲天文舉按劒東望益憂懼而先綦從容談笑
令取土一筐者賞錢百土壓火息城守無故賊稍稍
引去先綦潛出尾其後斬級無算文舉額手曰天平
微李生闔邑無遺類矣賊退上功幕府於是先綦之
名震江南北卒以諸生不及格獎勵而已未幾文舉
去賊復至先綦守東城如曩時有幕府兵從南來者
散漫無紀律南城邏者疑爲賊殲之郡邑懼幕府詰
之也遂以先綦擅殺聞下獄論斬會城陷乃免不知
所終

江南通志

張梅杞松兄弟三人親喪殯於室鄰火卒起棺不及

移三人號慟伏棺上誓與俱焚三人皆死棺獨完初
母病瘡甚重梅吮之得愈

江南通志

鄭文雄字功著漳國公亨八世孫偉身幹力千斤猿
臂善射崇禎九年張獻忠圍廬州經略盧象昇來勦
文雄獻滅寇等策盧奇之特薦授援勦都指揮使駐
兵河南府宜陽縣屢敗羣賊賊甚畏之擢廣西潯梧
營參將甲申之變欲自刎同官救之得不死永明王
擢爲總兵官賜蟒玉東西守禦數年大小十餘戰未
少挫人以飛將稱之 大兵下雲南文雄與戰於玉
龍關竟日身負重傷死妻夏氏子通年十五俱自刎

死 下三人本鄭達野史增入

諸生張駢公名宏他甲申間變哭之三日而病病已步至揚州以策干吏可法其要有三一日廢宏光擇立親王之賢者急發重兵守大河南北未草澤英雄以拯時艱策再上不能用歸自縊

梅衝華南鄉人本儒家子年十五因目疾失明遂以賣卜爲業甲申後寇中不歸遊於市中爲讎家所告鞠訊之曰身體髮膚受之父母不敢毀傷此聖人之教也吏怒杖之衝華不屈詞色益厲左右觀者莫不歎息泣下吏知不能屈卒釋之

董淵西鄉人重義輕財正統間歲荒淵出穀千石助賑題請褒異官立碑石居所優免差役今董家岡碑石尙存江西安遠知縣董正其裔孫也正另有傳

合肥縣志卷第二十三